

Z A K O N
O AGENCIJI ZA PRIVATIZACIJU
I JAVNO-PRIVATNO PARTNERSTVO

DIO PRVI

I. OPĆE ODREDBE, PRAVNI POLOŽAJ, SJEDIŠTE I POČETAK RADA AGENCIJE

Član 1.
(Osnivanje)

Ovim Zakonom osniva se Agencija za privatizaciju i javno-privatno partnerstvo (u daljem tekstu: Agencija), utvrđuje se njen pravni položaj, sjedište, djelatnost i nadležnost, odgovornost i obaveze, upravljanje, rukovođenje i finansiranje.

Član 2.
(Pravni položaj)

- (1) Agencija ima svojstvo pravnog lica.
- (2) Agencija je specijalizovana organizacija Srednjobosanskog kantona (u daljem tekstu: Kanton).

Član 3.
(Sjedište)

Sjedište Agencije je u općini Travnik.

Član 4.
(Početak rada)

Agencija počinje s radom danom imenovanja direktora i izvršnog direktora za finansije, odnosno imenovanjem vršilaca dužnosti.

DIO DRUGI

II. DJELATNOST I NADLEŽNOST AGENCIJE

Član 5.
(Djelatnost Agencije)

Agencija vrši stručne poslove pretežno privrednog karaktera i s njima povezane upravne poslove utvrđene zakonima i drugim propisima, koji se odnose na privatizaciju i koordinaciju poslova u oblasti javno-privatnog partnerstva.

Član 6.
(Nadležnost u oblasti privatizacije)

Agencija, u okviru svoje djelatnosti u oblasti privatizacije, vrši:

- a) organizovanje i podsticanje privatizacije privrednih subjekata na području Kantona;
- b) odobravanje početnog bilansa privrednih subjekata u skladu s metodologijom za pripremu privrednih subjekata za privatizaciju;
- c) određivanje, provođenje, organizovanje i nadziranje privatizacije privrednih subjekata na području Kantona, u okviru svoje nadležnosti;
- d) zaključivanje ugovora o privatizaciji privrednih subjekata putem prodaje privrednih subjekata, lizinga i drugih metoda;
- e) organizovanje i podsticanje obrazovanja i stručnog usavršavanja iz oblasti privatizacije;
- f) pružanje savjetodavne pomoći privrednim subjektima na području Kantona u oblasti privatizacije;
- g) organizovanje i provođenje informativno-promotivnih djelatnosti iz oblasti privatizacije;
- h) obavlja i druge poslove u vezi s privatizacijom, utvrđene zakonom i drugim propisima i odlukama Vlade Srednjobosanskog kantona (u daljem tekstu: Vlada Kantona).

Član 7.
(Nadležnost u oblasti javno-privatnog partnerstva)

U okviru svoje djelatnosti iz oblasti javno-privatnog partnerstva (u daljem tekstu: JPP) Agencija obavlja sljedeće poslove:

- a) priprema i podnosi Vladi Kantona godišnji plan aktivnosti i godišnji izvještaj o provođenju Zakona o javno-privatnom partnerstvu Srednjobosanskog kantona.

- b) uspostavlja i vodi Registar ugovora o JPP-u te osigurava da Registar bude javno dostupan;
- c) priprema te daje stručna mišljenja o pojedinim pitanjima iz ovog Zakona o Agenciji za privatizaciju i javno-privredno partnerstvo (u daljem tekstu: Zakon) i propisa donesenih na osnovu Zakona o javno-privrednom partnerstvu;
- d) prati postupak izrade te pruža stručnu podršku u postupku izrade trogodišnjih i godišnjih planova iz Zakona o javno-privrednom partnerstvu;
- e) na godišnjem nivou priprema i objavljuje zbirni pregled potencijalnih projektnih ideja JPP-a (katalog potencijalnih projekata JPP-a Srednjobosanskog kantona);
- f) daje mišljenje o osnovanosti inicijativa za izmjene i dopune Zakona o javno-privrednom partnerstvu, te drugih propisa o JPP-u;
- g) u saradnji s drugim nadležnim organima organizuje specijalističke programe edukacije za javna tijela i druge učesnike;
- h) saraduje s naučnim i istraživačkim institucijama, socijalnim partnerima, privrednim i nevladinim udruženjima te drugim zainteresovanim stranama u svrhu unapređenja primjene Zakona o javno-privrednom partnerstvu;
- i) vrši promociju i proučava primjenu najbolje prakse JPP-a te, u svom domenu, saraduje s domaćim i inostranim javnim tijelima i međunarodnim organizacijama te institucijama ovlaštenim za JPP, u skladu sa zakonom.

DIO TREĆI

III. UPRAVNO RJEŠAVANJE I UPRAVNI NADZOR

Član 8.

(Upravno rješavanje u oblasti privatizacije i sklapanje ugovora)

(1) Agencija, u okviru svoje nadležnosti u oblasti privatizacije, donosi pojedinačne upravne akte, na osnovu materijalnog propisa, a u skladu sa zakonom koji reguliše upravni postupak.

(2) U okviru ovlaštenja utvrđenih zakonom i drugim propisima, Agencija u postupku privatizacije zaključuje ugovore i posreduje u sklapanju ugovora.

Član 9.

(Upravni nadzor)

(1) O žalbama na prvostepena rješenja Agencije, donesena u upravnom postupku u oblasti privatizacije, rješavaju ministarstva Kantona, svako u okviru svoje nadležnosti.

(2) Inspekcijски nadzor vrše kantonalna ministarstva u okviru svojih nadležnosti.

DIO ČETVRTI

IV. SARADNJA S DRUGIM ORGANIMA I INSTITUCIJAMA

Član 10.

(Saradnja s drugim organima i institucijama)

U okviru svoje djelatnosti Agencija saraduje s organima u Bosni i Hercegovini, Federaciji Bosne i Hercegovine, organima uprave Kantona i drugih kantona u Federaciji Bosne i Hercegovine, općinskim organima uprave u Kantonu, međunarodnim institucijama i organizacijama u skladu s uputstvima Vlade Kantona.

Član 11.

(Obaveza dostave informacija i pružanja podrške)

Sva ministarstva i organi uprave u Kantonu, niži nivoi jedinica lokalne samouprave, kao i privredna društva kojima upravlja ili u čijem upravljanju učestvuje Kanton na osnovu državnog kapitala, dužni su dostavljati sve informacije i pružati svu podršku koja je potrebna Agenciji za realizaciju aktivnosti iz članova 5., 6. i 7. ovog Zakona.

DIO PETI

V. UPRAVLJANJE I RUKOVOĐENJE AGENCIJOM

Član 12.

(Organi Agencije)

Organi Agencije su Upravni odbor, direktor i izvršni direktor za finansije.

Član 13.

(Sastav Upravnog odbora i odgovornost za rad)

- (1) Agencijom upravlja Upravni odbor.
- (2) Upravni odbor se sastoji od predsjednika i četiri člana, od kojih je jedan član ispred resornog ministarstva, a kojeg nakon provedenog javnog poziva imenuje Vlada Kantona na prijedlog resornog ministarstva, na period od četiri godine.
- (3) Na prijedlog resornog ministarstva Vlada Kantona će u roku od mjesec dana od stupanja na snagu ovog Zakona imenovati privremeni upravni odbor.
- (4) Upravni odbor za svoj rad odgovoran je Vladi Kantona.

Član 14.

(Nadležnosti Upravnog odbora)

Upravni odbor Agencije:

- a) vrši nadzor nad zakonitošću rada i finansijskim poslovanjem Agencije;
- b) donosi statut Agencije, uz saglasnost Vlade Kantona;
- c) donosi poslovnik o radu;
- d) donosi druge opće akte Agencije na prijedlog direktora, izuzev Pravilnika o radu;
- e) usvaja finansijski plan i program rada Agencije, na prijedlog direktora;
- f) usvaja završni račun i izvještaj o radu Agencije;
- g) vrši i druge poslove u skladu sa Zakonom i Statutom Agencije.

Član 15.

(Direktor i izvršni direktor za finansije)

- (1) Agencijom rukovode direktor i izvršni direktor za finansije, koji mijenja direktora u odsutnosti.
- (2) Procedura za izbor direktora i izvršnog direktora za finansije provodi se putem javnog oglasa.
- (3) Na predlog resornog ministarstva, direktora i izvršnog direktora za finansije imenuje i razrješava Vlada Kantona, na period od četiri godine i mogu biti ponovo imenovani na još jedan mandat.

Član 16.

**(Nadležnosti direktora
i izvršnog direktora za finansije)**

- (1) Direktor i izvršni direktor za finansije organizuju, koordiniraju i rukovode izvršenje poslova u Agenciji.
- (2) Direktor i izvršni direktor za finansije u svom radu:
 - a) rukovode radom Agencije;
 - b) predstavljaju i zastupaju Agenciju;
 - c) odgovaraju za zakonitost rada, pravilno i zakonito vođenje materijalno-finansijskog poslovanja Agencije;
 - d) donose Pravilnik o radu;
 - e) odlučuju o zapošljavanju i raspoređivanju radnika Agencije;
 - f) donose pojedinačne pravne akte iz nadležnosti Agencije;
 - g) provode odluke, zaključke, upute i druge akte Vlade Kantona i Upravnog odbora Agencije;
 - h) obavljaju i druge poslove utvrđene zakonom, Statutom i drugim opštim aktima Agencije.

Član 17.

(Statut)

Statutom Agencije uređuje se naročito:

- a) organizacija i način poslovanja Agencije;
- b) upravljanje, nadzor i rukovođenje Agencijom;
- c) zastupanje i predstavljanje Agencije;
- d) druga pitanja u vezi s poslovanjem Agencije.

DIO ŠESTI

VI. FINANSIRANJE AGENCIJE

Član 18.

(Finansiranje Agencije)

Sredstva za rad Agencije osiguravaju se u Budžetu Srednjobosanskog kantona, donacijama domaćih i međunarodnih organizacija i iz drugih izvora.

Član 19.

(Finansijsko poslovanje)

- (1) Finansijsko poslovanje Agencije vrši se u skladu s propisima koji regulišu budžetsko poslovanje.
- (2) Raspodjela prihoda koje Agencija ostvari na osnovu obavljanja poslova iz svoje nadležnosti vrši se na osnovu odluke Vlade Kantona.

DIO SEDMI

VII. PRIJELAZNE I ZAVRŠNE ODREDBE

Član 20.

**(Prestanak rada
Kantonalne agencije za privatizaciju)**

Agencija za privatizaciju u Srednjobosanskom kantonu prestaje s radom danom početka rada Agencije.

Član 21.

**(Rok za imenovanje direktora
i izvršnog direktora za finansije)**

Na prijedlog resornog ministarstva Vlada Kantona će u roku od mjesec dana od stupanja na snagu ovog Zakona imenovati vršioce dužnosti, direktora i izvršnog direktora za finansije, na period od tri mjeseca, odnosno do završetka postupka imenovanja.

Član 22.

(Statut i opći akti)

(1) Statut Agencije donosi Upravni odbor uz saglasnost Vlade Kantona u roku od 15 dana od dana njegovog imenovanja.

(2) Upravni odbor Agencije donosi pravilnik o unutrašnjoj organizaciji i druge opće akte Agencije u roku od 30 dana od dana donošenja statuta.

Član 23.

(Rok za imenovanje Upravnog odbora)

(1) Na prijedlog resornog ministarstva Vlada Kantona će u roku od mjesec dana od stupanja na snagu ovog Zakona imenovati privremeni upravni odbor.

(2) Privremeni upravni odbor imenuje se na period od tri mjeseca, odnosno do završetka postupka imenovanja Upravnog odbora.

Član 24.

(Prestanak mandata)

Mandat direktora, Upravnog odbora i Nadzornog odbora Agencije za privatizaciju u Srednjobosanskom kantonu prestaje s danom prestanka rada Agencije za privatizaciju u Srednjobosanskom kantonu.

Član 25.

(Preuzimanje zaposlenika)

Danom početka rada, Agencija preuzima u radni odnos zaposlenike koji se zateknu na radu u Agenciji za privatizaciju u Srednjobosanskom kantonu, do dana prestanka njenog rada.

Član 26.

**(Preuzimanje poslova, opreme, sredstava za rad,
arhive, akata, predmeta i druge dokumentacije)**

Danom početka rada Agencija preuzima poslove, opremu, sredstva za rad, arhivu, akte, predmete i drugu dokumentaciju kao i druga prava i obaveze Agencije za privatizaciju u Srednjobosanskom kantonu, čiji je pravni sljednik.

Član 27.

(Prestanak važenja ranijeg propisa)

Danom stupanja na snagu ovog Zakona prestaje da važi Zakon o Agenciji za privatizaciju („Službene novine Srednjobosanskog kantona“, broj: 4/97, 7/05 i 10/12).

Član 28.

(Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Srednjobosanskog kantona“.

Broj: 01-02-987/25 PREDSEDavajući SKUPŠTINE

30. septembra 2025.

Travnik

Dražen Matišić, s. r.
